

Die Fassenacht iss erum

Jetzt isse erum, die goldisch Fassenacht, unn monsch ooner werdd saache „Gott sei Donk, ess hott gelongd“. Awwer dess sinn nor diejenische, die nitt aktiv sinn unn dess, was in de Säl unn uff de Gass bassierd, nor von Weitem odder nor vom Fernseh her kenne. Awwer nooch de Fassenacht iss vor de Fassenacht, weil die rischdische Fassenachter schunn omm Aschermittwoch oofonge, sich Gedonke ze mache ferr die nächst Kampagne, unn wenn donn ooner im nächste Jahr enn neie Vordraach mache will, fängt der schunn gleisch demett oo, alles uffzeschnabbe unn uffzeschreiwe, was die Leit zum Lache bringe kennt. Unn dess geht iwwers gonse Jahr unn wenn mir donn de Vordraach heern merke mir nitt, wie vill Arwett droi stegge dut, also Hut ab. Unn wenn donn im nächsde Jahr korrz vor de Sitzung ebbes Wischdigges in de Welt bassierd, muss dess joo aach noch in de Vordraach genumme werrn.

Unn wennde donn siehst unn heerst, wie dess meiste vunn Fraa odder Monn, ob gereimt odder in Prosa, im Hie- unn Hergerenne uff de Bien vorgedraache werdd, ohne uff enn Zeddel ze gugge, doo konnsde nor noch staune. Obwohl isch monschmol denk, die doo owwe hawwe enn Knobb im Ohr und wenn die nimmi weiderkenne, werdd dene ebbes zugeflissderd.

Jedenfalls die Flerschemer Fassenachter brauche sich nitt ze verstegele, die sinn gut unn dess iss aach rischdisch, dass ins Fernseh kumme, weil erstens emol alle Hesse wisse misse, dass in Flerschem „Hall die Gail“ gerufe werdd unn weil zweitens su Alde wie isch nimmi in e Fassenachtssitzung gieh unn die vunn de Kautsch aus verfolsche kenne.

Was misch gewunnerd hott dess war, dass allminonner nitt su arsch vill onn de hessisch Regierung unn in Flerschem omm Rothaus ze kritisiern hadde, offebar iss dess alles gut unn ordentlich unn doo gibt's nix ze veräbbele. No ja, alles habb joo nitt geheerd, villeischd iss doch ebbes debei gewese.

Die Fassenacht iss erum. Auf zum Heringesse!

Eiern Honnes